


KO KULWITABILO, MOSESA

 Nakusachila, Mulongo Naville. Mwabuka byepi mwane, balunda. Ke kintu kyawama kwikala kuno ja leelo mu tabbanako. Kabiji Nalangulukilenga mba kape inge Nakonsha kwikala na Mulongo Neville kusapwila lukeelo luno, Amiwa nakonsha kweseka bufuku buno. Kabiji nanchi Natajilenga ku lufunjisho lwa sukuulu wa pa Mulungu lukeelo luno. Kabiji ke... Inge Nkambo waswa, tunsakweseka kwi—kwikala na lulwe lufunjisho lwa sukuulu wa pa Mulungu.

² Pano, ke milungu ibiji, pepi, kufuma po Naishijile. Kabiji njibingi na lubazhibazhi nobe byonka byo mwaumvwine, amba, mu mwingilo, Najinga bingi, bingi wapwa kyakuuba mba kechi nakonsha kutwajijila ne. Kabiji nanchi Naishile mukuuba mba kokolokeko pacheche. Kabiji Naikele ku Wolf Creek Dam pepi nobe moba asatu, ku Kentucky, konka ko Nasemekejiawe. Nalangulukile mba, “Oo, Naumvwa bingi bulongo pano. Njitu bulongo.”

³ Kabiji Nabwelele ku nzubo, kabiji kintu kitanshi kicheche kyakumenye mu kilungi kyajinga ke kya lubaji lwa kafulumende na mambo a musonko. Natatwile jibiji kubwela panshi. Nanchi Nalangulukile mba kyakonsha kusendela kukila pa mulungu umo nangwa ibiji pakuuba mba kokoloke.

⁴ Kabiji nyingijilo yami pano keyiye na kupipulwa. Kabiji kechi njipo na mpwijilo yatanchikwa ne. Kabiji ao oene mambo o Naishijile kuno kuntu, kabiji nalangulukile mba, pano pa milungu icheche yakulondelapo, Nsakwikala na kukokoloka, ku kokoloka kwapwijijika, kabiji ne kupembelela pe Nkambo.

⁵ Kabiji anweba bantu bavula muji muno, aba batanwangakokala, aba baikala netu kimye kyabaya, bakonsha kuvuluka Nkambo byo aambile kwi atweba, Aye kimye kyonse ufikizha kyokya kyo Aambile amba Ukoba.

⁶ Vulukai, kimye kya kutatwilo, muno mu kipwilo, alwa lukeelo lo twashimikile jibwe ja tabbanako, abyo Aye... Kyanembwa, kabiji biji ponka pa jibwe, ne pa kipepala-kyakusa kya mu Baibolo wami. Alwa lukeelo, akya kimonwa kikatampe, kyaambile mba, “Aye kechi tabbanako yobe ne.”

⁷ Naambile mba, “Kwepi koiyi, Nkambo?” Aye watwajile mwiulu. Kabiji Viwi jaishile. Kabiji Natajile ne kumona misalabo isatu, nobe, binchi ne bipangwa byabyo, ne bikwabotu. Mwayuka kimonwa byo kiji. Kyanembwa, pa myaka yavula.

⁸ Kutola, juba jikwabo, buuku wakala kookwa, pa kutanga bintu bimo abyo Nkambo byo aambile, byo a ambijile jimo;

byafikizhiwa kala. Pa byubilo bya banyike, kabiji ne kondo byo ikekala, kabiji ne byonse bya bintu byaubiwa.

⁹ Kabiji pa kishalatu bintu bibiji, mu kimo kya byobya bya bungauzhi bikatampe. Kuuba mba, myotoka kwikala pa mukwakwa ne kukotololwa na kalimoti, uben kumweka nobe jike, kyakuuba mba kechi kumwendesha ne. Kizhalulula akyo kine. Kabiji amba kukekala mwanamukazhi wakila ukeya, mambo America ke kyaalo kya mwanamukazhi. Kabiji kikekala. . . Mwanamukazhi wakila ukeya, ne kwikala Ndamakyalo nangwa kintu kimo kyayewa musango, mu kyaalo. Kabiji nanchi po kukekala konaunwa kwapwijijika. Kyaalo kyonse kikonaunwatu shata.

¹⁰ Kabiji, amba, Naambila jimo. . . Pano akeye kechi ke Nkambo ubena kwikyamba ne. (Kikwabo, kya mwanamukazhi, kiji, ke Nkambo.) Bino Na ambijile jimo, mu 1933, amba ntanda ikakumanya konaunwa kwapwijijika '77 kasa akyange kufika.

¹¹ Nanchi, kechi Nayukile mba baji na kintu kyakonsha kwi kyonauna nobe byonka byo baji nakyo pa kino kimye ne, bino Namwene kyaalo mu konaunwa kwapwijijika, ke binshikitu bya binchi kabiji ne bintu biji byobya, byo kyapwile.

¹² Nanchi, kiji mujishinda kibena kwiya. Kabiji umvwe abye byonse bikwabo byafikizhiwa monka Aye mo ebyambijile, ne abyo bikekala byonka bya, kijitu pamo nobe Aye byo aambile mu Kinembelo papo, abya byo Aamba, inge Kilishitu waishile mu kimye kitanshi, Aye ukeya mu kimye kya bubiji. Kabiji ne bintu byonse byo Aambile bikafikizhiwa. Kabiji kine byo tubena kumona bibye, kabiji byo twayuka mba atweba twa. . . nambala yetu ijitu pepi kwitwa, nobe kyaalo, byo twayuka mba Kipwilo kijitu pepi na Kushikulwa Kwakyo. Kisukanya muchima wawa mwingilo, nangwa uji yense membala, pa kuyumba mba tuji mujino juba kabiji ne kimye kyo tubena kwikalamo. Ke kimye kyakijishamo akyo kyaikelemo muntu uji yense waikela pantanda, ke ponka pano; ko kuuba mba, ke kya Kipwilo. Nanchi, Amiwa kine nakebesha milombelo yenu.

¹³ Kabiji nanchi Namwene mu tabbanako, kabiji Namwene mba bajinga na. . . basakwikala na busaji-bwakubwezhapo kabiji ne bintu byonse, mu kipwilo, kwa bamo ba mukije kabiji ne bikwabotu.

¹⁴ Kabiji—kabiji kipwilo kyakebelenga mbung'eno icheche, kije kicheche. Kabiji kimye kyonse mungubila bingi lusa, kabiji mupesha. Kabiji ami pa kwikala kuno, kyamweka mba ke kya mapesho kwi anweba. Kabiji Njina luketekelo, pa kwikala ne anweba, kyaikala ke mapesho kwi ami. Kabiji kimye kyonse mwaikala bakuswisha byo Ng'amba kwikala ke Bukine, monka mo nehimwena kwi Lesa. Kabiji Na—Nasachila kyokyo.

¹⁵ Nanchi pano, Natatwile, kabiji nanchi Natatwile kukeba keba, kabiji ne kolola kipwilo kyetu, mu tubungwe twakyo,

kabiji pano ne bya busaji ne bikwabotu. Kabiji pano—pano, Nalangulukile mba, pa nyuma ya kikye, Nafuminepo na kukokoloka pacheche Saka kyangye kubwela mu mwingilo jibiji.

¹⁶ Kilamaitu mukachi kenu. Pano, kechi kya bapangye ne. Ke kyaino tabbanako. Tubena kukeba kwikala na misambo na ino tabbanako, pakuuba mba bintu byonse, kabiji ne bilubo byonse, bintu byonse bibena kubiwa, kabiji kape bintu bicheche kufuma ku umo ne ku mukwabo; aabo, Amiwa kasenda yensetu mwiabo ne kwibaleta pamo kilungi-ne-kilungi. Nanchi inge kechi ubena kukeba kwikikumanya ne, wafwainwa kusha kyaalo; mambo obewa ubena kutalang'ana nakyo kilungi-ne-kilungi, nobe byonka byo twaubanga pano pa tabbanako. Kabiji bonse twawamishapo, mambo twi balongo ne banyenga abo bashilang'ena kijilo, ye Mubiji wa Kilishitu, ku kilang'anya pa tebulu wa mapesho. Kabiji kechi pajipo kintu kikwabo ne ke diabola wakonsha kuba kintu kyonse kyatama, kabiji wakonsha kulengela ngumwino, nangwa kubulwa mutende, nangwa kintu kyonse kiji muyewa musango. Kabiji Mbena kusenda Mulongo Neville, kabiji tusakuya kufuma ku kifulo kimo ne kuya ku kikwabo, kabiji ne kuleta bantu ku bantu, pamo, poso tabbanako wakala wabwela, washimikwa jibiji, waimana, kuya mwaya Bumfumu bwa Lesa. Pano, ao, oene mambo o Naambila kikye, ke mambo akuuba mba ke jibumba jetutu jicheche lukeelo luno.

¹⁷ Kabiji pano Mbena kuya na kukokoloka, kabiji ne kubwela bukiji bukijitu mo Nakonsha kwikyubila. Nanchi Naketekela kubwela ku mwingilo jibiji. Kabiji pa kino kimye, inge Nkambo waswa, Nasaka kusenda toka tucheche to twabungizha mu bya bumali, kabiji ne bikwabotu, byami amiwa mwine, kuya ku...awe mutachi wakuya mubyaalo bingi mu bumishonyi. Kabiji ne kukeba tente wakatakata, kabiji ne byakwingijisha bya katataka, kabiji ne kutatula kuya mumwingilo. Kechi kufuma ku kipwilo kimo ne kuya ku kikwabo ne, bino kuyatu mu mbung'eno yetu.

¹⁸ Bino, kechi kulengulula balongo bangita ne, akyo kekintu kyawama. Bino byavula bya mubyobo, mutana mba ao makofalesi, baamba mba mukatanwako, kabiji pano balunda nenu bonse batwelamo, kabiji bonse batanwa kubamba babena kulombatu mali. Bibwezhatu boba bantu panshi. Natatulatu kutana kyokyo, mwamona. Nanchi akyo—akyo kechi kiji bulongo ne. Tubena kukeba kwikala na mpuzha ako kotwafwainwa kwi batwala. Anweba kechi mwafwainwa kuleta mali enu ne. Iyaitu, anweba bene, kabiji—kabiji ne kumwingijila Nkambo. Mwamona? Kabiji nanchi pano. . .

¹⁹ Kabiji ng'ingijilo yami pano yapipulwa. Anweba vulukai kimye kyo Nakwatanga pa kuboko kwa muntu, kabiji naimanatu popa, kabiji aye Nkambo wambulang'ana lukatazho lwabo byoluji. Waambile mba, "Kikeya kufikizhiwa mba, ukayukanga

kyafyamika kya mu muchima wa bantu.” Anweba bonse mwayuka akya kyamwekele monka mo Kyaambijilwe. Pano aye ke tampulo yalondelapo, akyo kyaawilwe kabiji ne kwambilwa jimo, akyo kikekala kyapitaila pa byonse Bye, mwamona. Kabiji alwa lupipu lubena kubiwa ponka pano.

²⁰ Kabiji ao oene mambo Satana kyo andwishisha na mambo a musoko, kweseka kumbula ami mba, kafulumende, amba Naikala na kongole ya musoko pajali jonse jo Tambula, nobe wamwingilo, kufuma pa myaka tweti-sebeni yapita, po natwelejile mu mwingilo. Kechi kiji byobyoye ne, mambo apita mu kipwilo kuno.

²¹ Amiwa ne waketekelwa wa kino kipwilo. Abyo kine ibyo. Kiji pa byanembwa kuno. Nanchi, pano, inge Amiwa ne kalama-waketekelwa wa kino kipwilo, nanchi mu ntanda kechi mujipo kintu . . . Kafulumende kechi ujipo na kimo kyakuba na kikye ne. Kechi babena kwipuzha kipwilo ne. Babena kungipuzha amiwa byonji kalama wa kipwilo. Kabiji baketekelwa bafwachikile kipepala mu bbaki kokwa, kokuba mba mali ami onse . . . Mukifulo kyakwikala na kipamo kyami amiwa mwine, Ne apishanga mu kipwilo kyami kuno, mambo kyafikilamotu kwikalala ke kipamo, nangwa byonka byo.

²² Kabiji pakuuba byobyoye, kikwasha kubula kunyema kipwilo kabiji ne kwikisha, ne kuya kulutwe kabiji kwakubula kwikalapo kintu nangwa kimo kuno ne. Panyuma ya Kulaya bantu amba Kabwelenga ku kipwilo, kimye pa kimye, kabiji ne kwi bakwasha. Ao oene mambo o Nekilamijile byobyoye, mambo Nalaile kwi anweba bantu. Akyo kyo kine kintu kyo Naikela nakyo muyewa musango, mukifulo kya kwikalatu bunke. Pano, umvwe mwauba kyokyo, kikala ke kabungwe. Kabiji Amiwa nashikwa bingi kabungwe. Nanchi Ne—Nekilamatu monka mo kyaikela, mu maboko akwa Lesa, pakuuba mba twakonsha kwenda kuya kulutwe na Bumfumu bwa Lesa.

²³ Pano, lukeelo luno, twakeba kutanga akye kyapeshiwa Kyambo kala, kabiji ne kuketekela.

²⁴ Bino, Nasaka kwamba, ne apo . . . Namona Mulongo Egan ne bavula, bamo baketekelwa baikala muno, panyuma ya kwikalala na misambo ya baketekelwa, bufuku bukwabo; kya kine, Amiwa naimana patoka ku meso akipwilo, amba anweba umo umo kechi mukiji ba—batongolwa baketekelwa ne. Mwibaketekelwa basalwa, kabiji jizhina jenu jiji mu mabuuku. Kijitu bulongo.

²⁵ Kabiji pano bakekala na bukwabo busaji bwa—bwa bakwasha, kabiji ne bikwabotu. Kabiji Mulongo Naville ke, usakwitanga baabo bukijitu pa kupwisha kupwila, kijitu bulongo, kabiji ne bakalama ba kipao ne bakwabotu, nobe byonka byo twatachikile kipwilo. Kitambulai, byonse byapita bya kunyuma, inengezhai, pano po tukekala na kusangululwa monka mo yikeshilanga.

²⁶ Pano, kasa tukyangye kuzhikula bipepala papo ne, na mambo alufunjisho lwa sukuulu wa pa Mulungu, ku kikye kyakila Kyambo kya Lesa wa bumi, twayai tukunyike mitwe yetu, pa kimyetu kicheche, byo tubena kwamba ku mwine Nembu wa yuwe Buuku. Kabiji fumyaimo milanguluko yonse, kintu kyonse kyapusanako, kyakonsha kwi mukanya anweba kutambula mapesho.

Twayai tulombe.

²⁷ Wakila mukuzhila kabiji Lesa wabololoke, mwi Anweba Mukyeenyi kyenu mo twaiya, na kupana kwi Anweba bimi bwetu, kabiji ne—ne yetu myeo, ne mibiji yetu, ne mpwijilo yetu, kabiji ne mataleta etu. Kabiji ne byonse byo tuji nabyo, twibileta kwi Anweba. Kabiji ne Anweba byo mubena kutala pe atweba, Nkambo, inge pajipo bubi buji patoka kabiji bwabulwa kusololwa, twi mwipuzha Anweba, Anweba Nkambo Lesa, amba Anweba mwitushimge Mashi a Mwaana Wenu, Yesu, kufika pa kyokya kifulo. Mambo, kuvulukatu mba mwiatweba bene kechi twafikilamo ne, kabiji popo kechi kyakonsheka kwi atweba kwikala bakwilama-atweba bene ne. Pakuuba atweba twaketekelatu kupwijijika ponka pa Mashi Anji awama, kabiji lusa Lwanji lwabajilwa kwi atweba, kyakuuba mba atweba babula kufikilamo bandengamambo twakonsa kwiya na kuchichika juba jimo mu Kyeenyi Kyenu, nakuleta kwi atweba ao Mashi akwa Nkambo Yesu. Ao, Anweba, mu bimye bya kunyuma, o mwaitabizha kwikala ke Mashi a Mwaana Wenu yeka umotu, kabiji apana yewa mulaye, amba, “Kupichila mwi Aye, inge twisola bubi bwetu, tukabingishiwa ku lusa Lwanji.”

²⁸ Kabiji pano twaipuzha, Nkambo, amba Anweba mwakonsha kwitulekelako ku bilubo byetu byonse, bubi buji bonse bwakuzhilulula nangwa bwamulekelesha, mizhilulwila, amba umvwe mulanguluko watama wapita mu mweo wetu, na miketo yakwa diabola, amba Anweba mwakonsha kupanga awe mulwanyi Wenu watama, kabiji wa bantu Benu.

²⁹ Kabiji twalomba mba Anweba musakutuma Mupashi Wazhila atole Kyambo pa kino kimye, byo tubena kwipana atweba bene nobe bingijisho, amba Anweba musakwambila mwiatweba, ne kumvwina mwiatweba, Kyambo Kyenu. Kabiji lekai ne atweba twi Kitambule nobe kyafuma kwi Anweba, kabiji ne pakufuma paino mpuzha, leelo, tumvwe mba twalungamikwa—jibiji ku mwingilo wa Kilishitu; kyakuuba mba twakonsha kufikilamo bulongo ku mpwijilo ya bufuku buno ne keesha, namambotu alupepu lwa Mupashi Wazhila.

³⁰ Peshai balongo betu konse konse, bipwilo bya kumbana panopantanda, aabo babena kukwachijila Kyambo kya Bumi mujino juba jibi. Twalanguluka mba kechi kwakishala kimye kyabaya kya kwingijilamo ne, mambo bufuku bubena kwiya buki buki. Aa makumbu akondo abena kwiya jibiji. Bubi

bujitu pepi, kabiji twalomba mba Anweba musakwituswisha kwingila kyabaya kukila ne panyuma. Kokoloshai mibiji yetu yakoka, Nkambo, kabiji ne kwitutura jibiji ku kondo. Mambo twakipuzha mu Jizhina ja Nkambo Yesu, kabiji ne pamambo Aaye twalomba. Amena.

³¹ Byo tubena kushikula, lukeelo luno, Baibolo, mu—mu kyapitala kubu 11 kya Buuku wa Bahebelu.

³² Pakisatu bufuku twaambilenga kufuma mu kyapitala kyabu 7 kya Buuku wa Bahebelu, pa “Melekezendeke, wajinga wabula shanji, kabiji wabula inanji, wabula ntendekelo ya moba, nangwa mpelo ya bumi ne.”

³³ Kabiji Nalanguluka mba, kape, lukeelo luno, kyafwainwa kufikilamo kuzhikula jibiji awe Buuku wawama, byokiji kiji kyakwaamba mba tuji na kintendekesho pa byo tubena kukeba kwambapo, mutangilo yapita kunyuma. Kabiji kukiluka pa kyapitala kyabu 10, kabiji kyapitala kyabu 9, ke mizhilo ya bitapisho, twakonsha kufika patu paji “lwitabilo.” Kabiji papo mu Buuku wa Bahebelu, kyapitala kyabu 11, ne kutatwila pa veeleshi 23, Twikitanga nobe bibye:

Ko ku lwitabilo Mosesa, pa kusemwa, wafiilwe bang'ondo basatu ku basemi yanji, mambo bamumwene mba wajinga mwaana wawamisha; kabiji kechi bachiine mukambizho wamfumu ne.

Ko ku lwitabilo Mosesa, byo aishile wakoma, ko akaine kutelwa bumwaana ku mwaana Felo wamukazhi;

Wasalulwileko kumanama pamo na bantu bakwa Lesa, ne kukana wakaine kumona lusekelo lwa bundengamambo lwa kimye kimo;

Kasa alanguluka mba kunenwa mwenga pe Kilishitu kyakila kuwama bunoshi bwa Ijipita: . . . mambo watajile ku mfweto yo akafwetwa.

Ko ku lwitabilo ko ashile ntanda ya Ijipita, ne kuchina bukaji bwa mfumu ne: mambo aye wakosele, nobe wamumona aye ubula kumweka.

³⁴ Nasaka kutola mutwe, lukeelo luno, “kusalulula konka ku lwitabilo.” Kabiji Nasaka kutola kibaba, byambo bitanshi bisatu bya kyapitala kyabu 23, *Ko lwitabilo, Mosesa*. Kabiji, “kusalulula konka ku lwitabilo,” bintu byonse byo tuuba, twafwainwa kusalulula konka ku lwitabilo. Kabiji byonse byo twatana byauble Mosesa, abyoyafwainwa kupitulukamo, byajinga bya ku lwitabilo; kechi bya kumona na meso ne, kana konka ku lwitabilo.

³⁵ Kabiji ene mambo o Nasajila kikye lukeelo luno, mambo kipwilo kiji mu yuwe musango, kyaikala kuuba mba mwetu. . . ne mu masuukulu etu, kabiji monse mwazhokoloka, twaikala

bingi na mafunjiho a kisaayasi. Mambo a kikye, twafumya bantu ku lwitabilo. Bino, lwitabilo kechi lushiniikishiwa ku saayasi ne. Lwitabilo ke kyokya saayasi kyo ibula kumona. Kabiji atweba. . .Inge twataya lulwe lwitabilo lwabaya, nishi atweba tuji mufishi iine iine, ke. . . nangwa twikale bafunda byepi, nangwa tulondolole byepi Kyambo kya Lesa, amba kyesakane na monka mwaila luketekelo lwetu.

³⁶ Kechi kujipo jishinda ja kutoksha Lesa pa muchima ne, kanatu na lwitabilo. Akyo Kinembelo kyaambatu patoka muyekao musango, kabiji ke kya kulwitabilo. “Kabiji kwakubula lwitabilo,” byo kyaamba Kinembelo, “kechi kyakonsheka kutoksha Lesa pa muchima ne.”

³⁷ Nancchi, inge lwitabilo lwapusenamo na saayasi, kabiji saayasi yapusenamo na lwitabilo, akyo kibika byonse bye—bye ke bya kwiimena abyo bine na bine, nanchi twafwainwa kufukula byonka byaubile Mosesa. Ko kulwitabilo ko twaketekela!

³⁸ Bino, inge twataya lwitabilo, nishi milombelo yetu kechi ikakumbulwa kwi Lesa ne. “Mambo awa wiya kwi Lesa wafwainwa patanshi kwitaba mba Aye iye, kabiji ye ufweta bonse bamukebesha Aye.” Nanchi, inge twataya lwitabilo, milombelo yetu yaaluka ke yatutu; kafwako nangwa kumo ko twakonsha kuya ne.

³⁹ Nanchi ke byobya byotwakonsha kulanguluka, lukeelo luno, ke kukwachijilatu ku lwitabilo. Nanchi, inge twataya lwitabilo, luketekelo lwetu nishi lwaya. Kabiji umvwe twataya lwitabilo, bututulu bwetu bonse bwa bumupashi nishi bwaya. Mambo, kuuba mwaikala na lwitabilo mubitu byo mumona ne, mambo bintu byonse byo mumona ke byobya byonaika.

⁴⁰ Inge twatata pa muntu umo wakilamo, wamwingilo wakilamo, nangwa kipwilo kyakilamo, byonsetu bikonaika, juba jimo. Kabiji umvwe twatata ku kyaalo kyakila, nangwa kilwilo kyakila, byonse bikonaika, juba jimo. Kabiji twafwainwa kwikela ku lwitabilo, lwa byobya bintu saayasi byo yabula kwambapo. Ke kulwitabilo tu twaitabila.

⁴¹ Pano, tutaya lukumo lwetu umvwe twataya lwitabilo lwetu. Bino, inge twafumako ku lwitabilo, nishi twasenda kipwilo mu buyuke bwa kumubiji.

⁴² Kabiji bimye byavula, kikala mu milanguluko, ya bantu, amba mambo kipwilo kyabaya, kabiji baji nabipwilo byakila, mitenge iji na mikungu yalepa, ne byakila, bavula bavwala-bulongo ne bantu bo babena ku komesha ne kufunjisha bulongo, kabiji ne bya bumali byavula, kyakuuba mba bakonsha kunoka abya bintu, atweba, bimye byavula, balanguluka mba akwa ke kutundaikwa ku mupashi, amba akye kipwilo kya tundaikwa na mupashi. Nangwa, bimye byavula tutongola basapwishi bapusanapusana baya na kusapwila kabiji bekala na mabumba

abaya, kabiji tulanguluka mba, bimye bimo, amba abya ke biyukilo bya kutundaikwa na mupashi. Bino abo kechi bo bwine bukine ne. Akwa ke kutundaikwa kwa bumuntutu.

⁴³ Pakuuba kwiine kutundaikwa namupashi kwiya pa kuba kyaswa muchima Lesa. Mwamona? Nangwa ujitu umo, nangwa baesakanatu. Nangwa kipwilo kibaye, nangwa kipwilo kichepe, kechi oene mambo ne. Nangwatu ekale wakila, musapwishi wamba bulongo, nangwatu muntu wabula kuyuka ne ABC's, kechi oene mambo ne. Kiyilatu pa mbila yo abena kuleta, kana ya tundaikwa na Kyambo kya Lesa, nangwa, kana ya tundaikwa na milanguluko ya kufunda ya tundaikwa na bumuntu?

⁴⁴ Bantu bamo bakonsha kutundaikwatu na mambo a musapwishi wamba bulongo. Akyo kechi kikilengela kwikala bulongo ne. Bimye bimo batundaikwatu mambo muntu wafunjishiwa bingi kyakuuba mba mulanguluko wanji wa mutanchika bingi bulongo. Akyo kechi kyalumbulula mba ke kya kwa Lesa ne. Mwamona?

⁴⁵ Kiyiilatu mu kya bu Lesa bya myaka ne myaka, Kyambo kyapeshiwa kya Peenape, popo twakonsha kutambula lutundaiko lwa mupashi, kabiji alo lwapanwa na Mupashi Wazhila. Ko kulwitabilo ko twikitambwila.

⁴⁶ Pano twakonsha kulanguluka pe Mosesa, kabiji ne kikye kimye kyabaya kya bumi bwanyi. Kabiji tutanga kunyuma, ya kusemwa kwanji, kabiji ne Lesa byo amulamine, bino kwaishile kimye mu bumi bwakwa Mosesa akyo kyafwaijilwe kwikala kimye kya kusala. Inge twatanga bulongo, twatana kuuba mba wajinga mwaana ku mwaana wamukazhi wakwa Felo, kabiji wajinga swanyi wakuswana bumfumu, kabiji wafwaijilwe kwikala felo wakulondelapo mu Ijipita. Nanchi aye wamwenenga pa kukeketa, byo akomene kabiji wa kuyuka byawama ne byatama, kabiji kwajinga ne boba bazha baingijilenga mu bimbo bya milobwe. Kabiji Mosesa, inge watala pa bipeeze bya nzubo ya lukena, pa bonka bazha bamo abo Felo bo atajilengapo, bino pajinga lupusano pa yoya tajilo.

⁴⁷ Nasaka kwikajika ao mulanguluko, lukeelo luno, pa ma mineti acheche, kabiji lekai Lesa wa Mwiulu e kikajike mu muchima yense uji muno. Kijitu byo utala pa kintu kiji kyonse, kyo kileta lupusano.

⁴⁸ Aye musapwishi wakila, John Sproul, ao ye baitabizhe ku nyingijilo yakwa Mulongo Bosworth, baanga mwi anweba bavuluka myaka yapita kunyuma, ya kwa Old Glory Barn. Aye waambile mba, juba jimo wajinga pa lwendo, mutemwe mulunda nanji kabiji mukazhi kasa akyangye kufwa ne. Bajinga mu La Salle, Lorraine, France. Kabiji Najinga na jishuko ja kuya ku mpuzha imo. Kabiji utangijila wibatwajilenga kupita mu majimi, kabiji ne kwi bamweshu bintu byapusanapusana. Kabiji bafikile ku kibumbwa loba kimo kyakwa Yesu Kilishitu,

kupopwa kwanji. Kabiji Mr. Sproul baimene palepa, kasa babena kutalapo, aye ne bakazhi banji, kabiji, mu michima yabo, abo bajimbulwilenga mbumbi kyoajinga nakyo mu milanguluko, nangwa sendwe ubasa, nobe byonkabyo, byo asongele mujibwe, kintu kiji na mwekelo-yatama kwimenako kumanama ne butemwe kabiji ne lusa lwa Nkambo Yesu, kabiji byo kyalengelwe kyatama ne mwekelo-ya tetaulwamo. Kabiji utangijila washile kwi Mr. Sproul, kabiji waambile mba, “Mwane, Naketekela mba anweba mubena kujimbulula kikye kipasha kyakusonga kya Nkambo Yesu.”

Kabiji aye waambile mba, “Yami iye.”

⁴⁹ Kabiji aye waambile mba, “Amiwa kechi na kumyapo nangwa pachechetu ne, mambo bantu bavula bekitala, patanshi, be kijimbulula.”

⁵⁰ Kabiji Mr. Sproul waambile mba, “Kika, Amiwa kechi namonapo lusa nangwa lutundaiko lwa kutala pa kintu kiji byobya ne, nanchi Mbena kukumya kika sendwe ubasa kyo ekilengejile muyuwe musango.”

⁵¹ “Kabiji aye sendwe ubasa . . .” Waambile mba, “Mr. Sproul, akye kipasha kyakusonga kijitu bulongo, kabiji ne sendwe ubasa wajinga na kintu kijitu bulongo mu milanguluko yanji. Bino paji lukatazho ke, luji ne anweba. Kijitu jishinda jo ubena kwikimwenamo.” Kabiji aye wamusendele ne mukazhaji ku maboko, ne kwibatangijila panshi ya kitapisho kushi ya yuwe musalabo. Kabiji aye waambile mba, “Pano, Mr. Sproul, talai peulu pano.” Kabiji byo atajile peulu, waambile mba muchima wanjji wakakelwe kupema. Lupusanano lwajingapo, kwimana palepa popa kabiji ne kutajila *lolwa* lubaji, ne kuya kushi kabiji ne kwikitajila mu musango mo kyalengejilwe kutajilwa.

⁵² Kabiji ajo jo jishinda Lesa jo ajimo. Ao ye musango mwaikela lwitabilo. Kijitu mujishinda mo wikitajila. Inge watalapo nobe kiji mu musango wa Baibolo wajishimikila, ja kintu kimo kyajingako mu moba apita kunyuma, obewa kechi ukatana bwiine buwame buji mu Baibolo ne. Wafwainwa kufukamina mu manungo obe, kabiji ne kukokela mizhilo ya mu Baibolo, ne kutala pe Akyo kupichila mu meso a Mupashi Wazhila.

⁵³ Nakonsha kwimpuzha aje jibumba, lukeelo luno. Ing’anyi buwame bwa Lesa wajishimikila bo akonsha kuba leelo inge kechi Aye ye Lesa umotu ne? Ing’anyi buwame bwa Lesa, ao wakonsha kutola Mosesa ne kwingila nanji byakukumya byo aubile, ing’anyi buwame kyo bwakonsha kuba kwi atweba kutanga pa yeo Lesa inge Aye kechi ye Umo leelo ne? Ing’anyi buwame bwa Lesa wakonsha kupokolola kufuma mukisha kya mujilo, baana baki Hebelu, inge kechi Ye Lesa umotu neleelo ne? Ing’anyi buwame bwa Lesa ao wakonsha kuchiba mambo pakachi ka kyaoloka ne kyabula koloka, mu juba japita, kabiji wamanyika kyabula koloka ne kupesha kyaoloka,

inge kechi Ye Lesa umotu neleelo ne? Kika kyo tuyila ku kipwilo? Kika kyo tufumina kubitu bya muntanda, inge Aye kechi ye Lesa wabuchibishi bwamambo bumo ne, kabiji ne kwikala nandangulukilo imo Yoajinga nayo ne? Ing'anyi buwame bwakonsha kwikalako ku yewa Lesa wakonsha kukwata mwanamukazhi na mashika abaya, kabiji ne mashika aleka, inge kechi Ye Lesa umotu neleelo ne? Ing'anyi buwame bwakonsha kwikalako kwingijila Lesa waichile mulunda Nanji kufuma mukilende, panyuma ya kufwa pa moba foolo, inge kechi Ye Lesa umo neleelo ne?

⁵⁴ Ko kulwitabilo ko twayukila mba juba jimo jalukumo Aye uketwita kufuma kumaloba, jibiji nangwa twikaletu mujisho wa buto bwayula. Twakonsha kwikishiniikisha byepi? Atweba kechi twikishiniikisha ne. Atweba twikitabilatu. Atweba kechi twaipuzhiwa kushiniikisha kiji kyonse ne. Twaipuzhiwa kwikiketelatu.

⁵⁵ Ko kulwitabilo Mosesa ko aubijile *bikanaga-ne-bikanaga*. Kabiji Mosesa, nobe ukitwala, watajile mu kipeze kya nzubo ya lukena, pa bazha, aye wamwene jibumba jimo ja mateshi, ndochi, bazha bayulamo-biko boamwene Felo.

⁵⁶ Kabiji Felo byo atajile pe abo, ne bena Ijipita, kafwako kyo bajinga ne ke jibumbatu jabazha. Akyo kyo kyonka kyobawamijilekotu; ke kwikalatu bantu bakutanwa mu mateshi, ba kulenga matafwali amateshi a kupana bukwasho ku mizhi ayo Felo yo ashimikilenga. Abyo bena Ijipita ne Felo byo byo batajilenga pa bazha.

⁵⁷ Pakuuba Mosesa, byo atajile pe abo, yajinga mwekelo ingi ayo Mosesa yo ajinga nayo. Byo amwene, pa kupita pa kipeze, kufokoka kwa mu kilungi kyabo, mipolo ke ikukuluke pa mabuta abo, kabiji mibiji yabo yakokomana, aye wamwene pe abo nobe bantu bakwa Lesa. Aye kechi wamwene pe abo nobe bazha ne. Aye wamwene pe abo nobe basalululwa bantu ba Lesa.

⁵⁸ Kabiji, oo, nobe Amiwa byo ng'enda enda, kufuma kukyaalo kimo ne kuya ku kikwabo, na kusapwila! Kufuma po Nashijile bibelo bya ino tabbanako icheche, akye ke kifulo kyabula kya bundinominesheni, kyabula mizhilo pano butemwe, kafwako buuku kanatu Baibolo, kafwako mafunjisho akipwilo ne kanatu Kilishitu, Naeseka kutala pa baana bakwa Lesa, kabiji ne paboba bobakana, pano pakwikala basalululwa bakwa Lesa kabiji bantu basalwa. Amiwa kechi ne bepuzhane kana boba ku Branham Tabbanako. Amiwa kechi ne bepuzhane kana boba ku Methodist, nangwa kana boba Presbyterian, nangwa kana boba Pentekosito, nangwa ba Nazarene, nangwa ba Pilgrim Holiness. Nsakatu kutala pe abo nobe bantu bakwa Lesa. Kabiji pa kumona ng'ingijilo yabo ne byubilo byabo, amba boba kalume bakwa Nkambo Lesa. Kabiji nkebelo ya muchima wami ke kwikala lumvwang'ano nabo, nangwa bekale batelwa

mu musango wabyepi. Amiwa kebatu lumvwang'ano naabo. Nebatemwa mambo Nayuka mba boba bantu bakwa Lesa.

⁵⁹ Inge Namona mwanamukazhi ke eye mukwakwa, na siketi walepa, kabiji ne suki yanji wiyuba bulongo kunyuma, kabiji—kabiji wavwala ndeleshi ibena kumweka-mushingi; kabiji Namona mukwabo inetu wakyanyike, kapepo myakatu imo, na kaputula kakacheche ko avwala; wakonsha kwikala, mwaila mwekelo, waikala wamukila kulamba bibese bibiji awa mwanamukazhi uji na suki yalepa, mwaila mwekelo ya muntanda, bino Amiwa katola lubaji lwa yewa songwakazhi wavwala nobe Mwinakilishitu. Nangwatu bakonsha kumuseka, ne kumutela mba wamukeyu, nangwa byonkabyo, Amiwa katola lubaji lwami. Aye kechi wakonsha kwikala walamba nobe songwakazhi mukwabo ne, mu mwekelo, bino wamonapo kintu kimo. Ko kulwitabilo ko Amumwena Aye ubula kumweka, Ubeni kutangijila bumi bwanji.

⁶⁰ Inge namona mwanamulume uji pa kinto, kasa abena kutelwa mba “kwasho,” nangwa “musapwishi,” nangwa “wamukeyu,” mambo aye wakana kupepa, kabijii ne kutoma maalwa, ne kuya ku byakuzha, nobe bonse bakwabo bashala, kabiji aye utelwa mba “ke wamukeyu,” muchima wami uya kwiaye. Aye ke mulongo wami, monka mukachi ka yuwe mushiji wa Ijipita, akyo kilengela muchima wetu kukeba kumupakachilamo ne kwamba mba, “Mulongo, twi bakang'enda ne benyi, ba muino ntanda, kabiji kebesha kwikala mulumvwang'ano pamo ne anweba.”

Mosesa wasalululwe, wasajile konka kulwitabilo.

⁶¹ Baanga banabalume ba kyanyike bafwaijilwe kunyemena pa jishuko ja kwikala mwaana wakwa Felo wamukazhi! Baanga banabalume ba kyanyike bafwaijilwe kunyemena pa jishuko jajinga ne Mosesa, ja kwiyoa mu kisangajimbwe ne buwame bwantanda, ja kwikala mfumu wa Ijipita, ja kwikala na ntanda yonse kumaulu anji! “Ke kyabulamo bingi maana,” banabalume bakyanyike bajuba janji byo bafwaijilwe kulanguluka, “Mosesa byo asalulwile kwikala na kifulo kyanji pamo na bamanyikwa kabiji ne babena kuyanda bantu bakwa Lesa.”

⁶² Kika kyo ekyubijile? Ko kulwitabilo, byo asutwile meso anji, aye wamwene kyakila pa buwame bwa ino ntanda. Aye watajile kyakila pa byakisangajimbwe bya bubu. Kabiji Baibolo waamba mba aye wachichikile nobe Aye wamumona Ao wajinga ubula kumweka, ko kulwitabilo, kabiji aye wasalulwile kwingijila yewa Lesa nangwa bika byakonsha kumweka.

⁶³ Kechi kyapipulwa ne. Bavula ba mwiawweba bakonsha kuya kukyokya kyo batela mba kishimikwa kyawama. Twakonsha kumvwa buwame, kapepo, lumvwang'ano lwa bupopweshi kasa twaikala mu kipona kyawama. Twakonsha kwikala bakila kuyukanyikwa, kutoma ne kupepa, kabiji kumvwala ne kuuba

mubila ntanda. Bino lukatazho lwepe? Wasutula meso obe, kabiji kulwitabilo Aye wamumona Ao ubula kumweka, kabiji watola lubaji lwa kwimana pamo na bakanwa ne batelwa-mba boba kyoongyo kyazhila ba mu jojo juba. Mambo ko kulwitabilo Aye kotumumwena Ao ubala kumweka, kusalulula byakumanyikwa ne kumanama.

⁶⁴ Amiwa kechi naamba ku bantu amba bakonsha kusalulula kumanama ne. Amiwa kechi naamba mba mwafwainwa kusalulula kumanama ne. Kechi kyafwainwa kwikala ngubilo ya bumuntu ne. Pakuuba inge kumanama kwaikala mujishinda jobe ja mwingilo, lekai twikitambule monka mokibena kwishila. Amiwa kechi nakonsha kubila muntu kintu nangwa kimo kyakumulengela wasekwa ne. Amiwa kechi nakonsha kukeba obewa kwamba bintu byapusanako ne, amba, “Amiwa ne. . . Nalamata ku kipwilo akyo kibula kuketekela mu *kikananga-ne-kikananga*, mu mantanda,” kabiji ne bintu byamusango yewa, bya kulengela bantu ke bakuseke. Obewa ubena kwiletelelatu obewa mwine. Amiwa kechi nakonsha kwamba mba ufume muno utwajijile kabiji ne kuba kintu kimo kyapusanako bingi ne. Amiwa kechi nakonsha kukeba obewa kuba kyokyo ne, kyakuuba mba muntu umo ke akwambile mba uji nakisangajimbwe ne. Wiletelela kyokyo pe obewa mwine. Pakuuba inge kiji mujishinda jobe ja kwingijila Lesa, lekai ntanda yambe kyonse kyobakonsha kwamba. Obewa twajijilatatu nakwikala.

Obewa salulula. Yense mwanamulume ne mwanamukazhi wafwainwa kuuba kikye.

⁶⁵ Ibyepi umvwe Felo wamwene kyamwene Mosesa? Aye wamwene kumanama kwa bantu. Aye wayukile fweto ya kufumyamo mu kikye. Bino ko kulwitabilo ko ekisalulwile, kukila kwikala na kisangajimbwe kya bubi.

⁶⁶ Kwakonsha kwikala banyike, bainetu bakyanyike baikala muno, nobe banabakazhi bakyanyike balamba bingi. Ntanda yakonsha kukwambila obewa amba, “Uba *kikye-ne-kikye*. Wiwalamba. Mubiji obe walengwa bingi bulongo. Wakonsha kumwasha kyokyo.”

⁶⁷ Bino, nyenga yami, sutula meso obe ne kutala pa kyakila pa kyokyo, kwi Aye waambile mba, “Ke kyabunya mwanamukazhi kumvwala kyakuvwala kya mwanamulume.”

⁶⁸ Inge banabalume ba bantu mu kijiji kyenu, inge banabakazhi bo mutanwa nabo, baamba mba, “Tenda suki yobe yalepa. Wakonsha kumvwa kutalala. Kyakonsha kwikala *kikye, kyokya*, nangwatu *kikwabo*.” Nangwa, “Mba kyokonsha kukulengela kwikala wawaminako.” Kechi wakonsha kuteleka ku kyokyo ne!

⁶⁹ Obewa sutula meso obe, kabiji konka kulwitabilo Umumone awa waambile mba, “Suki ya mwanamukazhi ke lukumo lwanji, kabiji kechi wafwainwa kwi itenda ne.”

70 Inge baamba mba, “Kyakonsha kukulengela kuyukanyikwa. Po pakuuba mba wakonsha kuuba bulongo na kito yobe, nangwa na mukulumpe wakito, wafwainwa kutomako twakuleta kusangalala. Inge wakonsha kupepa fwaka nobe banabakazhi bashala, ukemana bingi bulongo mulumvwang’ano na bomwalamakana nabo.”

71 Konka kulwitabilo sutula meso obe ne kutala pe Aye Ao waambile mba, “Nkowesha yuwe mubiji, kabiji ne Amiwa kamonauna.” Ko kulwitabilo ko twaketekela bibye bintu. Kechi kiji mubyobya byo mumona ne. Ke bintu byo muketekela. Ko kulwitabilo, Mosesa koaubijile.

72 Kabiji mululwe lwendo lwa lwitabilo, pekalapo kimye kimo kya kusalulula.

73 Lota waubile kyokya kilubo kyabulanda kyonka kyo tubapo. Bimye byavula tusalulula kyakonsha kwituwamina. Tusalulula bintu byakonsha kwikala byawama.

74 Kimye kimo umvwe mwatanwapo kalukatazho kacheche mu kipwilo, kabiji muntu umo wakonsha kwamba mba, “Kyawama, bakwasho nangwa ba kafunga banji kululwe lubaji.” Kechi mwafwainwa kutala ku kyokyo ne. Talaitu pakyokya kyaoloka. Fumyaipo kyokya kintu ne kwibaleta pamo. Abo bo bulesa.

75 Kuji kusala. Kabiji twisajilatu byetu atweba bene. Tusalululatu kintu akyo kituwamina.

76 Pakuuba Mosesa wasajile bya kumanama ne byobya bileta buvu, pa kuuba mba wakonsha kwenda na bantu ba Lesa. Langulukaipo pakikyeye. Telekaiko kukikyeye. “Wasalulwile bya kumanama bya bantu bakwa Lesa, kabiji ne kwikibala nobe kyabunoshi bukatampe, mambo aye wachichikile, byo amwene Aye Wajinga ubula kumweka.”

Bino, Lota, kimye kimo, wasalulwile.

77 Kabiji kyakonsha kwikala, lukeelo luno, amba kusakwikala banabalume ne banabakazhi baikala muno, abo basa kusalulula kyapelako. Obewa uji byonka byo uji, mambo myaka yavula kunyuma wasalulwile kwikala byo uji pakino kimye. Kabiji abya byo wakonsha kusalulula pa kino kimye bikakutangijila moukekela myaka faivi yakulutwe kufuma ja leelo. Myaka faivi kufuma ja leelo wakonsha kwikala mishonale. Myaka faivi kufuma ku jaleelo wakonsha kwikala Mwinakilishitu wayakuwa.

78 Nangwa, myaka faivi kufuma ku jaleelo wafwainwa kwikala ku ngehena, mambo kufukula kobe kwatamine. Myaka faivi kufuma pa kino kimye kape ukomvwanga byakushipilamo bikopolo mu bishimikwa bya maalwa. Myaka faivi kufuma ku jaleelo kape ukekalatu pite pa mukwakwa.

79 Nangwa, obewa ukekala mwanamulume nangwa mwanamukazhi ao—ao uji wamunema ku kijiji, mambotu

akusalulula kobe kwa Kilishitu. Myaka faivi kufuma ku jaleelo kapepo ukekala mu Lukumo, waya mu Kushikulwa, mambo wasalulula jaleelo.

⁸⁰ Bino wafwainwa kwikala wakusala. Kabiji kechi mwakonsha kutala pa byo mumona ne. Salululai byo mumona ku lwitabilo. Akyo kyo kintutu kyafwainwa kubalwa, ke kyokya kyo usala na lwitabilo.

⁸¹ Lota, byo asalulwile. Abulahama wapaine kwi Lota kusalulula kwanji.

⁸² Kabiji Lesa ukupa kusalulula kobe. “Salululai anweba jaleelo ye mukengijilanga.” Mu bujimi bwa Edena mwajinga kinchi kya—kya maana, kabiji ne Kinchi kya Bumi. Muntu wapewe nsambu ya kusalululapo kimo kyo akeba. Kabiji nanchi byo byokiji buleelo. Wapewa nsambu yobe, nobe wakonsha kwisajila, kwisajila kyonse kyo ukeba kusala.

⁸³ Bukwashi bwami kwi obewa, ke, kechi mutale kubitu byakatataka bimuzhokoloka ne, ne kuyukanyikwa kabiji ne buwame bo uji nabo ne. Pakuuba salululai, kanatu, koka kulwitabilo, Aye wapaine mulaye amba juba jimo Ukeya kabiji ukaleta patoka byonse byatama, kabiji ukemupa Bumi Bwapenape, kabiji ukemusangula. Kechi one mambo ne umvwe mwasenda jishinda jasulwa na bacheche ba Nkambo, salululaitu anweba. Inge kuji lukatazho mukuboko, inge kuji lukatazho muntanda, inge kuji lukatazho mu kipwilo, inge kuji lukatazho mu nzubo, nangwatu lwikale kwepi, ikalaitu na kusala kwenu, “Ko kulwitabilo, Amiwa kamwingijila Lesa. Amiwa ka kepesha muchima wami mu Kyeenyi Kyanji. Amiwa kasenda jishinda ja baana bakwa Lesa. Nebamona basulwa kabiji bakanwa, ne kulupulwamo kabiji ne kuletelwa bisela, bino Amiwa kasendatu kifulo kyami kyamwingilo. Amiwa kekalatu monka bulongo. Kabiji umvwe bajila, Amiwa kajila nabo. Kabiji umvwe kwaikala bulanda, Amiwa kekala nabo na bulanda. Jishinda jobekelamo, Amiwa nkekala.”

⁸⁴ Nobe Naomi waambile mba . . . Nangwa, Luta waambile kwi Naomi mba, “Mashinda enu ekale ke mashinda ami. Mashinda ami ekale ke enu. Komwikala, Neami kekala konka. Komukaya, Neami kokaya. Awa Lesa ye mwingijila ukekala ke Lesa wami.” Tolai kokwa ku salulula, nangwatu kyafwainwa kufumyapo kikoba kyenu kya buyuke bwa bumuntu, kulanguluka mba obewa wi muntu umo. Vulai kikoba kyenu ne kusenda jishinda ja bacheche ba kwa Nkambo basulwa, kabiji ne kwikala wamushingi mu mwingilo kabiji ne kutanwa pa kifulo kya mingilo.

⁸⁵ Lota watajile kuzhokoloka. Aye waambile mba, “Amiwa nasalulula.” Kabiji aye watajile kujiya ku Sodomu. Aye wamwene misaza yamunyevu yawama kukila byo amwene Abulahama, kabiji ne kwajinga Abulahama. Aye wamwene

jishuko ja mwakujila banyama, kwakala na bang'ombe babaya kabiji bang'ombe bawama.

⁸⁶ Naketekela kechi mbeni kuko zhapo muntu nangwa umo ne. Bino ayo yo nyimeno ya basapwishi bavula bingi, ya kunekenya Mambo awama, kasa balunguluka mba batambwilemo mali avula mu kikye. [Mulongo Braham waimba mapi jisatu—Waku.] Ke jichikichi ja kujilamo kajo! Amiwa kyawama kwikala muntanda yauminina, ne kuja, kutoma kufuma ku musapi, kabiji ne kuja tubashinkwa twakonsa, kukila kunekenya bintu byashininwamo lwitabilo lwami bya Kyambo kya Lesa mumi. Amiwa kasendatu jishinda jami.

⁸⁷ Bamo baambile mba, “Billy, lukatazho lo lwepi na mbung'eno yobe, byo kutanwa ba Pentekosito bavula bingi.” Wamwingilo umo wadinominesheni yayakuwa ye waambile kyokyo.

Naambile mba, “Bushe dinominesheni wenu wakonsha kulipilila mbung'eno yami nyi?”

⁸⁸ Kechi papita kimye kyabaya ne, mu magazini wa *Talai*, Naketekela ibyo, mwajinga jishimikila. Kabiji munembeshi waambile mba, waambilenga pa bantu baki Pentekosito. Aye waambile mba, “Akye kipwilo kya Pentekosito ke kipwilo kibena kukoma bingi lubilo muntanda leelo.” Kika? Ke mambo akuuba mba banabalume ne banabakazhi basutula meso abo ne kutajila palepa.

⁸⁹ Kabiji munembeshi watakaikile bingi bantu baki Pentekosito. Oo, nangwa byonkabyo, aye waambile mba, “Mujipo bamo mukachi kabo baya mungi, kabiji ne bikwabotu. Bino, ba Methodist bapopwela lufunjisho lwa kipwilo. Bapopwela Lesa kupichila mu lufunjisho lwa kipwilo. Ba Baptist bobatu musango umo, kabiji ne ba Presbyterian. Pakuuba ba Pentekosito bapopwela kupichila mu Baibolo.”

⁹⁰ Ko kulwitabilo ko tumwena mulaye. Amiwa kasenda lubaji lwami nabo, nangwatu basulwe byepi, Amiwa ne umo wa mwiabo. Nangwatu basekwe byepi, kabiji baji na byabo-bya-kwaluka aluka, nobe byoka byauble Isalela, Amiwa kechi nafwainwa kwimana kulubaji lwa ngauzhi wabubela uji ku katumbatumba ne, wabu Balamu, kabiji ne kweseka kufinga akyo kyo apesha Lesa. Mambo, muyoya nkambi muji Jibwe jo bapumako, kabiji ne Kitapisho kya mashi, ne Mubulungwa wa Mujilo. Nangwatu bekale mu kyabyepi, kibena kwibatangijila kulushijilo, kabiji bafwainwa kwiya kwiakyo, mambo ke bantu ba bumulaye abo babena kwendela kulwitabilo. Nangwatu kechi baikele bu dinominesheni ne, bajinga bakuzhokolokatu, kabiji abyoye ne bantu bakwa Lesa pamo. Bino Nasaka kutola lubaji lwami neabo, kukwatakana nabo mukachi kabo; kechi mu madinominesheni abo ne, bino mulumvwang'ano lwa bupopweshi lwabo mu byanembwa bya Mupashi Wapenape

wa Lesa, abyo, ko kulwitabilo ko Natambwila lubatizhilo lwa Mupashi Wazhila. Lesa nkwashai kwikala nayewa musango kimye kyonse.

⁹¹ Ngimonai. Byo baendeleko kulutwe, twatana kubamba Lota wamwene mashuko a—a bang’ombe banuna. Bavula bamona mashuko a kubaisha buuku wamupokochi. Bavula bamona mashuko a kwimana bulongo mukijiji. Aye wamwene jishinda ja kunanwinamo madola acheche. Aye wamwene jishinda jakwikelamo meya wamuzhi. Nobe kwikala mwenyi, kabiji muntu wamaana bingi, nobe byo ajinga, “Kapepo Amiwa kekala mwine mukatampe muntu wayewa muzhi.” Aye wamwene mashinda mambo aikele kulutwe yanji. Bino aye kechi wamwene awa mujilo wakonauna ntanda ne. Aye kechi wayukile ayemwine ne, amba aya ntanda yajinga yayulamo bubi ne, kabiji Lesa wiyonawine.

⁹² Kabiji, leelo, bantu basaka kwitekenesha abo bene mukwamba mba, “Obewa yobe. . .?”

Nsawkwamba mba, “Obewa wi Mwinakilishitu?”

⁹³ Baamba mba, “Amiwa ne mwina America.” Akyo kechi kijipo nakintu nakyo ne kijitu pamo nobe mubena kwambila kikwangala amba wi bombwe. Kechi kijipo nakintu kimo kya kwingila nakyo ne. [Mulongo Braham watota maboko anji jimotu—Waku.]

⁹⁴ Aye ukonaunwa, mambo Lesa ye waoloka. Kabiji umvwe America wapuluka na bubi bwanji, aye waoloka kabiji wiimena pabunke bwanji, Lesa wazhila ukekala na mwingilo wa—wakusangula Sodoma ne Gomola kabiji ukalomba lulekelo lwa mambo pa kwibasoka, namambo abubi bwabo; inge Aye wituleka twabula kuzhatwa.

⁹⁵ Inge Aye wimuleka mwaya Mwiulu namingilo yenu yabulwa koloka, Aye ukasangula Ananyasa ne Safila ne kwibapa jishuko jikwabo. Aye kine wakonsha kwikyuba. Bino Aye waoloka. Ananyasa wamwene mali anji. Petelo wamweneko Kilishitu.

⁹⁶ Oo, ami! Lota kechi wamwene konaunwa kwa baana banji muyoya mpuzha ne.

⁹⁷ Bavula ba mwianweba, leelo, mwakwachijila ao mafunjisho abipwilo ne bintutu bikwabo, kechi mumona byubilo byatama byabakitwala kabiji ne konaunwa kwa baana benu ne. Anweba kechi mumona mwanawenu wamukazhi munzubo ya buule ne. Anweba kechi mumona mwanenu wamulume kasa apendwa ne, nangwa kasa anji pa tebulu kuntu kumo wangyuka.

⁹⁸ “Mambo akuuba aye watekezhiwa-bulongo.” Kabiji ku bubi kechi bambako ne. Aye kechi wamwene mukazhaji ne, tangi wa tubungwe tonse, waalulukile ke sumba ya mukele, kasa abena kumutala. Aye kechi wamumwene byo anyemenenga ne wapulukile kwepe, kuya ku kamuzhi kakwabo, kunyemesha

bumi wanji. Aye kechi wamwene kyokya ne, mambo aye watajilengatu pa byo amwenenga kulutwe yanji.

⁹⁹ Bino, Abulahama, aye kechi wamwenepo ntanda yatekezhiwa-bulongo ne, mambo wasutwile meso anji ne kumona keesha, mambo aye ukekala ke swanyi wabintu byonse. Aye Mwinakilishitu wakine leelo usutula meso anji peulu kabiji ne kumona mulaye wa Kilishitu: “Batokwa bakimote mambo bakaswana bintu byonse. Abo bakaswana ntanda.” Aye Mwinakilishitu wakine, konka kulwitabilo, utala peulu ne kumona kyokya. Mwitai kika kyo mubena kukeba. Aye wasutwile meso anji. Kabiji byo aubile byobya, Lesa waambile mba, “Abulahama, enda kupita muntanda yonse, yo yobe.” Ko kulwitabilo Abulahama ko aubijile kikye; lwitabilo lumotu lonka lwajingapo ne Mosesa.

¹⁰⁰ Kyanembelwe ku umu ng’ambi, ao waambile bibye. Ndanguluka mba byajinga byambo bimo byakila mukuwama. Awa Abula-... “Mosesa watolele lubaji lwawamisha lwa ntanda ne kubika pa shikelo umu; kabiji bupopweshi bwakila mukutama, ne abo bebubika pa shikelo mukwabo; kabiji bupopweshi bwakila mukutama shikelo-wanemene kukila byawama bya muntanda.”

¹⁰¹ Nanchi byo byokiji leelo, inge twatelwa kintu kiji kyonse kyontukeba kutelwa, “bakisangajimbwe,” nangwa “lubuko lwa Bulesa,” nangwa mba “boba kyongo-kyazhila,” nangwa monse mobakebela kwichila. Musango wakila kutama ye tujimo wakila-shikelo wa byobya byawamisha bya pantanda. Kechi bakeba kutelwa mba “musango-wakala, kafwa wakala, kisangajimbwe.” Kyakonsha kukila kunema-pashikelo bintu byawama diabola byo akonsha kupana kwianweba. Kya konsheka kine kubiwa.

¹⁰² Mosesa wamwene kwendelekwa kwa Kilishitu kukila kunema. Aye wamumwene Kilishitu. Kulutwe waambilepo ng’ambilo yakila kushingwa pe Aye. “Monai, Nkambo Lesa wenu ukemupa ngauzhi wamukipasha kyami.” Aye wayukile. Aye Wamumwene, kabiji aye wanemekele kwendelekwa Kwanji ke bunoshi bukatampe bwakila buwame bonse bwa pantanda.

¹⁰³ Mwinakilishitu mulunda, leelo, kuuba wikyuba akyo nenyi? Kabiji buwame bonse ne kuyukanyikwa kwa ntanda, ko kulwitabilo, ko twamumwena Aye walaile. Kabiji kipwilo kyakila mu kutama leelo, mu musango yense mo kyaikela, nangwa byonkabyo Kikekala kyanema shikelo-kukila bintu byonse diabola byo akonsha kupana. Inge twaabanwapo, inge twachibaulwa mubipivwa, inge twavundakana kabiji ne kupelelwa, mu madinominesheni kabiji ne mukisangajimbwe, kikekala kyanema shikelo-kukila kintu kyonse diabola kyo akonsha kupana kwi obewa. Kyakine.

104 Aye wamwene myendeleo ya Kilishitu bunoshi bukatampe kukila bya bunoshi byonse bya mu Ijipita. Nanchi wafwaijilwe kubapo kintu kimo. Aye washile Ijipita. Oo, Natemwa kyokyo kyambo. Aye washile Ijipita. Monai, aye watajilenga mu kipeze kimotu, bino aye watajilenga kyapusanako na kya kwa Felo. Ibyepi Felo inge wamwenenga mpelo yanji? Ibyepi Felo inge wamwenenga kyaalo kyanji byo kibena kuloba na meema? Mosesa wikimwene. Mujishinda ka? Monka mu saayasi nyi? Ko kulwitabilo, Mosesa ko ekimwenejile. Byonse bintu byo aubile byajinga bya kulwitabilo, mambo Lesa wamulaile Abulahama, aye shanji, amba Aye uka—ukapepula kikye kyaalo pakupita myaka foolo aduleendi, kabiji mba ukebalupulamo. Kabiji ko kulwitabilo, Mosesa ko aketekejile Kyambo kyo aambile Lesa, kabiji wayukile aye mwine, nobe kulwitabilo, kwikala ntangi wasalululwa kwi balupulamo. Aye wayukile koajinga. Aye watolele lubaji lwaji lwa mukimbotela, nobe ukandula mulobwe, kabiji wabajile myendeleo ya Kilishitu bunoshi bukatampe kukila kwikala pa jitanda ja Ijipita. Aye watolele. . . Aye kechi waambile mba, “Ne kyumvwina lusa ne.” Aye watolele kifulo kyabo ne kuya nabo! Lukumo kwi. . . Aye watolele kifulo kyabo. Twaile nabo.

105 Kechi kyakukumya ne munembeshi wshingilwe kunemba mba:

Tola lubaji na bacheche ba Nkambo
balengululwa.

Natatula mukachi ne Yesu, pano Mbena
kupita.

Nji mujishinda ja kuya ku Kenana. (Kine.)

106 Mosesa. Kyaambiwe na umo wajinga ne Mosesa, wafwaijilwe kwikala mwaana wakwa Felo kabiji ne buwame bonse bwa ntanda, wasajilepo kwikala mwaana wakwa Abulahama kukila kwikala mwaana wakwa Felo. Mwaana wakwa Abulahama, wasulwa, kukila kwikala mwaana Felo, aye mfumu.

107 Amiwa kyangwamina kwikala mwaana wakwa Nkambo Yesu, kabiji kalume mulunda Nanji, ne kutola kifulo kyami na bantu bakanwa baino ntanda, kukila kwikala Ndamakyaalo wa uno mukatampe United States of America, nangwa kwikala Elvis Presley, nangwa Pat Boone, nangwa uji yense ye musaka kwikala. Amiwa katola jishinda jami.

108 Bainetu bakyanyike nabo bafwainwa kutola mashinda abo. Mukifulo kya kwikala ke—ke Mary Pickford, nangwa umo wakila sendwe wabisela, songwakazhi umo wawama, tolai lubaji lwenu na bacheche ba Nkambo basulwa.

109 Amiwa kyangwamina kwikala musapwishi mu pulupiti, ne kusapwila byafyamika bya bunoshi bwa Kilishitu, kukila kwikala sendwe wabisela wa mu Hollywood, nangwa muntu wakilamo pano pantanda. Inge Nafwainwa kuja kachechetu,

kulombatu, nangwa kiji kyonse kyo Nakonsha kuuba, Amiwa katola jishinda jami na bantu ba Nkambo. Ko kulwitabilo, ko Naubila kyokyo. Napewapo mashuko. Bino, ku lusa lwa Lesa, Amiwa kimonatu koka kulwitabilo.

Koka kulwitabilo Nakonsha kwikimwena
palepa;
Kabiji Shetu ubena kupembelela mu jishinda,
Na kwitunengezhezha kifulo kyakwikalamo
Kokwa.

110 Awa muntu wamusoko waambile mba, juba jikwabo, “Kika kyo waswishishe nzubo yobe ku kyokya kipwilo? Kika kyalengejile obewa kupana nzubo ya tweeti-faivi-sauzande-dola ku koka kacheche ka tabbanako kamwekatu-malabishi?”

111 Naambile namba, “Kechi kyajinga kipwilo kyo Naubijile byobya ne. Ke bantu banji mukachi momwa.” Amiwa kechi njipo na bipe bya panopantanda ne. Peni yense wamali ye Ntambula upanwa ku kino kipwilo. Kika? Lwitabilo lwami lunji mwi Lesa, kabiji kechi pa bintu bya panopantanda ne. Bya butemwe byami biji mwiulu. Kabiji Naketekela mba anweba bonse mujitu musango umo, inge mujitu bulongo na Lesa. Kya kine, amba byo muji. Atweba, koka kulwitabilo, tutambula. Atweba, koka kulwitabilo, twaketekela Lesa.

112 Mosesa, aye wasalululwe. Kabiji nanchi wafwaijilwe kuuba, panyuma ya kusalulula, aye walwishishe lwitabilo, bino, kechi wajinga na moyo wa bukaji bwa mfumu ne. Pano, mwaila bumuntu, aye wajinga na nsambu ya kuchina bukaji. Aye wajinga na nsambu ya kuchina bukaji bwa mfumu, bino aye kechi wikyubile ne. Aye kechi wikyubile ne, mambo wajinga na mwingilo wakwingila, kabiji wajinga mu ndonda ya mwingilo. Kabiji aye kechi wateleko maana byaambile mfumu pa kikye ne. Aye watoleletu Jishinda janji mu musangotu umo.

113 Bino, Felo, nangwa byonkabyo, byo amwene mba washindwa, aye wakebele kupana kwi Mosesa ne baana. . . Aye waambile mba, “Kijitu bulongo, Nsakwimubula byo Nsakuuba. Anweba bonse ikalatu monka mu ino ntanda bino kasa muya nakupana bitapisho kwi Lesa wenu.”

114 Abyo diabola byo engila. “Oo, wakonsha kwikala mupopweshi. Kika kyakubula kuya na kutwela mu kipwilo kikwabo? Anweba kechi mwafwainwa kuuba byonse bye bintu ne.” Muntu umo waambile ku mukazhaji. . .

115 Mukazhi waambile mba, “Mwatawami, Natambwile lupulukilo. Kechi kuji bya kuwamisha ngala ne, nangwa kupeta mivumbo ne bintutu bikwabo. Kechi kuji kutwajijila bibye ne. Kafwako bya bijilo ne. Kafwako bya mitachi ya tubungwe ne. Amiwa nafumamo! Amiwa kabika kimye kyami mu kutanga Kyambo, ne kulama nzubo.”

116 “Pano, talai, mutemwe. Anweba, mwakonsha kwikala wa bupopweshi, kijitu bulongo. Pano, talai, anweba—anweba muya *kukwe*. Muji mu kipwilo kyatama.”

117 Ine, kechi ibyo ne. Anweba muji mu kyoka kyalumbuluka. Inge muji na musapwishi ukasapwila kyokyo kwi anweba, mwafwainwa kwikala monka. Kebakebai kunyuma kupita mu Binembelo kabiji mutane kana akyo kijitu bulongo.

118 “Oo,” waambile mba, “yainga *kukwe*. Abo kechi—kechi bakonsha kuba kyokya kuno ne. Mwamona? Kechi boba bibye kuno ne.” Ajo jo jishinda . . . “Yaingatu palepa.” Bino aye kechi ukeba anweba kufuma muntanda ne. Ajo jo jishinda jo obilamo diabola. Aye kechi ukeba anweba kufuma mu bintu bya muntanda ne; letaitu ntanda pamo ne kipwilo.

119 Juba jikwabo, pa kwiya mukwakwa, Nashinkwile waileshi wami. Kabiji pajinga lwi—lwimbo, kabiji Natwajijiletu na kuteleka, kabiji kya Nsendele, pepi nobe, kupwisha lwimbo yense, kasa Nkyangye kuyuka kana wajinga lwimbo wapwijijika wa bupopweshi nangwa ne, inge ne diabola ubena kukeba kubwezha panshi bintu bya kwa Lesa bikale pa kipimo kimo na ntanda. Kuuba wauba kyokyo ne! Lesa etubiletu lusa!

120 Amiwa kechi nasakamana ne nyimbo inga yo anemba Elvis Presley, yonse nyimbo yawama ya bupopweshi. Aye wa kiyulwamotu na diabola. Aye watuma baana bavula bingi ku gehena, kabiji ne byonse bikope byo Nayuka, monse mu ntanda mu jino juba. Pat Boone ne bakwabotu bashala, aye wa ku kipwilo kya Kilishitu; kabiji Elvis Presley, waki Pentekosito; ke Yudasa Isakaliota, mu musango wa boba banabalume. Aye diabola ubena kukeba kuleta bintu byepeulu byakwa Lesa, pakuuba mba bakonsha kwibimvwanga *papo*. Bantu kechi bakonsha kutala peulu ya *kikye* ne. Abo batalatu *papo*, amba, “Kyawama, kijitu pamo.” Kechi kijitu pamo ne. Fumaimo mu ntanda.

121 Waambile mba, “Mwakonsha kuyatu moba acheche. Kabiji yainga, mukekale mu ntanda.” Kine, wayukile mba bakabwela. Nanchi wataine mba akya kechi kyakonsha kwingila ne, nanchi walangulukile kintu kingi. Aye waambile mba, “Amiwa sakwimubula byakuba. Mwakonsha kuya konse komukeba kuya, bino mushe bakazhi benu bonse, baana benu bonse, kabiji ne bang’ombe benu bonse, bashale *kuno*. Mwibashe kuno, kabiji anweba muyenga.” Mambo, aye wayukile mba bajinga na bilelwa kunyuma, abyo byakonsha kwibalengela kubwela jibiji.

122 Kabiji abyo diabola byo byo aamba kwi anweba. Kikulutu mwashalako na bintu bimo bya muntanda kasa bya kikobama pe obewa, mu kikebatu kupepa, mu kikebatu kutoma, mubena kukeba kumvwa nobe ntanda, abyo kijitu pamo nobe byonka diabola byo akeba.

123 Amiwa ngumvwa bingi pa byakubwela munyuma. Naketekela kechi kujipo byakubwela panyuma nobe bantu byo balanguluka mba kobiji ne. Basha bingi bya bunoshi bwabo mu Ijipita byakonsha kwi babwezha jibiji, abyo ibyo. Kubwela munyuma kechi byobyoby bamba mba byokiji ne. Mwashile bingi ntanda kunyuma kokwa, abyo byongola.

124 Mulongo, Nakubula, kimye Isalela kyo enengezhezhe, pa kachi kabufuku, bajinga na byonse byo baji naabyo mu ino ntanda, baalonga kabiji benengezha kuya.

125 Lesa etutumine kusangululwa kwa musango yewa. Twaalonga bintu byonse, kabiji benengezha kuya. Jiwi ja pakachi kabufuku jibena kwiya, "Yainga na ku Mukumanya." Kyawama bintu byonse byalongelwa jimo. Kyawama kubula kwikalapo nakintu nangwa kimo ne, ino ntanda, kya kukubwezha kunyuma, mizhinge yonse yakukubwezha panshi. Loongai. Twayai twinengezhe. Tubena kuya.

126 Kabiji mwayuka kine kintu nyi? Ne mubula, bajinga ba kishika bingi kwi Lesa, poso Felo byo ajinga na kisangajimbwe pakachi kabufuku, aye waambile mba, "Lupukaimo! Lupukaimo, kabiji muyenga. Sendai bintu byonse byo muji nabyo, ne kuya muyenga!"

127 Amiwa njibingi na lusekelo kyakuuba mba muntu wakonsha kwikala pepi bingi ne Lesa, poso diabola wakakalwa ne byakuba. Abyo ibyo. Lupukaimo! Lupukaimo! Kokelai Lesa!

128 Koka kulwitabilo, aye wamwene mulaye. Wakutobola mulobwe, nangwa kechi kuji wakutobola mulobwe ne nangwa ko anji, aye watolele jishinda janji na basulwa bacheche bakwa Nkambo. Felo waambile mba, "Sendai byonse byo muji nabyo mu fume muno! Amiwa kechi nayuka byakuuba ne anweba ne." Aye wajinga wa bukishika kwi Lesa, koka kulwitabilo.

129 Lwitabilo lwingila byakukumya, inge waikala wakishika kwi Lesa. Ko kulwitabilo, kotumumwena Aye.

Kimye kyetu kyafika; bya pita kunyuma.

130 Bino, koka kulwitabilo, lukeelo luno, sutulai meso enu. Kechi mumone bintu bimuzhokoloka ne, ino ntanda yakatataka, bino talai ne ku Mumona Aye wapaine mulaye. Aye Baibolo waamba mba, "Atweba kechi tumona bintu byonse kasa byalumbuka ne, bino Yesu tumumona." Talai pe Aye, lukeelo luno, ne mashinda enu akonsha kupipulwa.

131 Kimye kyo twakunyika mitwe yetu, pa kimyetu kacheche, tulombe. Lekai Nkambo abikepo mapesho Anji pa Mbila.

132 Langulukai mu muchima obe. Uba talenga pa bintu bya muntanda nyi? Koko kulwitabilo, mwamumona Yesu nyi? Bushe ubena kutala pa kuyukanyikwa kobe, kwa kipwilo kyobe nyi? Pa lumvwang'ano lobe na bya ntanda nyi? Kana, ubena kumona Yesu Ao, pakukumvwina lusa, wibikile Ayemwine ku kuboko

kwa kilujo kya Mfumu Mwine wakila, Ao wamanamine mambo akwipana kulufu, waoloka pa babula koloka? Kechi wakonsha kusutula meso obe ne kumona kyokya Kinchi kya Bumi kulutwe nenyi? Nanchi, shai akye kinchi kya saayasi ne maana, ne kumwingijila Aye.

¹³³ Mwakonsha kutemwa kuvulukwa mu milombelo kasa kyangye Kulomba nyi? Imikai maboko enu, ku kyonse kya kukabila kyo mwafwainwa kukabila. Lesa emupeshe. Aye ubena kumona maboko enu onse.

¹³⁴ Inge windengamambo, pano sutulai meso enu ne kutala. Inge wajinga wapusanako, inge wajinga na byakwamba amba kabiji ne tubintu tucheche, ng'anyi lupusano lujipo? Obewa ukafwa juba jimo. Ng'anyi juba? Kapepo leelo! Obewa kechi wayuka ne. Awala umotu kufuma pa kyo kino kimye, wakonsha kwikala mugehena, nangwa wakonsha kwikala Mwiulu. Bino wafwainwa kusalulula ponka pano. Inge mujipo kintu kimo mu bumi bobo kyabula kulumbuluka, usalulule ponka pano, koka kulwitabilo.

¹³⁵ Mwaamba mba, “Kyawama, inge Nakonsha kubwela pepi na wamukazhi! Inge Nakonsha kubwela kwipi na wamulume!” Kechi mambo ne nabyo baubile, salululai Bumi. Salululai Bumi.

¹³⁶ Mambo, Yesu waambile mba, “Inge kechi wakonsha kulekela mambo muntu uji yense mu muchima obe wazhilulula ne, nangwa Shenu Wamwiulu naye kechi ukemulekela mambo ne.” Nanchi ikalaitu pepi pepi. Inge pajipo kintu kimo mu muchima obe na muntu uji yense, ndengamambo nangwa wazhila, uji mulukatazho lwa mujilo wa mugehena.

¹³⁷ Pano sutulai meso enu. Kika kyo ubena kumona, mulwanyi wenu nyi? Nangwa, ubena kumonapo Mupulushi obe? Kika kyo ubena kutalapo lukeelo luno?

¹³⁸ Inge wakolwa, ne dokotala obe waamba mba kechi wakonsha kukosa ne, sutula meso obe, ku musalabo, iko ko Afupilwe pa mizhilulwila yetu, ko ku bipumo Byanji ko twabukilwe. Kechi mutale pa byaamba ba dokotala ne; aye ubena kwingijila mu saayasi. Lwitabilo lwingijila mu kibese kya Mupashi ne Lesa. Twayai tulanguluke pa bibye bintu mu kimye kyo mwasutula maboko enu. Lesa wi bamona.

Twayai tulombe.

¹³⁹ Anweba Lesa Wapenape, mukuzhindama kwa bubwe bupopweshi, panyuma Mbila yasapwilwa, kechi muleke aye nkunwa ya Kyambo Kyenu, Nkambo, iponene pa mushiji wa bumabwe ne. Kechi muleke Mbila, Nkambo, iponene mu bisonsonya ne, mu miba, bya kusakamana bya buno bumi (nobe Lota) byakonsha kupikakanya, ku mpelo yabyo, byaikalatu byakutaya. Pakuuba, Anweba Lesa wapeshiwa, lekai bipunene pawama, pa mushiji watemba, pa michima yalajika. Kabiji ne wami, ne aye, Nkambo, pa kuuba mba atweba bonse tutale mu katajilo kakwa Lesa, ne Kipwilo kyasulwa kya Nkambo Yesu,

bantu basulwa, jishinda jasulwa, kabiji lekai twendele mujije jishinda ja lukumo.

¹⁴⁰ Nobe Mosesa, aye kechi wayukile ko ayilenga ne. Bantu kechi bayukile kobayilenga ne. Abo kechi bayukile jishinda jakuyamo ne. Batatwilekotu.

¹⁴¹ Kabiji, Anweba Nkambo Lesa, awe lwimbo wawama byo abena kwimbiwa, konka kulwitabilo twakonsha kumona yoya Ntanda palepa. Twayai pano twikaletu, banabalume ne banabakazhi babena kubula kulanguluka pantanda byo isakwamba ne, nangwa kana babena kuya byepi. Lekaitu bemane mu mipashi yabo, kabiji ke kuya.

¹⁴² Mosesa walondejile Kyeya, kabiji kya Mutangijile ku ntanda ya mulaye. Kwakubula ne kuyka koayilenga, bino waendelengatu monka mu Kyeya, kuya kuyooya ntanda ya wamisha.

¹⁴³ Swishai, Nkambo, leelo, kya kuuba mba bavula muno bende mu Kyeya kya Kinembelo ne mu lumvwang'ano lwa Mupashi Wazhila, kabiji ne na Kipwilo; Kipwilo, Mubeji-wakusemwa, baana basemwa katataka aba batambula Kilishitu, kabiji bayuzhiwamo na Mupashi Wazhila, ne kutangijilwa na Mupashi. Lekai twendele mu lulwe lumvwang'ano, kyapamo, kasa tuzhokoloka ku byanembwa bya Lesa, kumwingijila Aye mulubatzhilo, mu lukokelo lwa lufu Lwanji, kuzhikwa, ne kusanguka. Lekai tumwingijile Aye monka mo Akambizhizha, "Pembelelai monka mu Yelusalema poso mu kayulwe na Bulume bufuma Kwiulu." Lekai tumwingijile Aye mu lubuko lwa Bulesa, kulombelela bakolwa. Lekai tumwingijile Aye ne mukijilo, kutebula shinkwa, na muchima umo, ne lumvwang'ano lwa Kyambo kya Lesa. Lekai tumwingijile Aye monka mwaila byanembwa Byanji bya Bulesa, poso Ntanda yamweka. Kiswishai kye, Nkambo. Umvwai milombelo yetu, byo tubena kupana byonse kwi Anweba, mu Jizhina ja Nkambo Yesu.

¹⁴⁴ Pano na mitwe yetu yakunama, bitende bitende, pachepache, twayai twimbe awe lwimbo. Pano abwe ke bupopweshi. Mbila yapwa. Kafwako wakulupuka ne. Ikalaitu bazhindama. Twayai tupopwele.

¹⁴⁵ Mbila yo yoolola. Langulukai pano kyo mwauba, ne kyo mwafwainwa kuuba, akyo ki mulengejile kwikala byo muji leelo. Kika kimulengela kuzhatwa, leelo, ke mambo akuuba mba anweba keesha mwaubilepo kintu kimo. Kikekala byepi ja keesha jikeya? Oloolaipo leelo, kabiji keesha jikeya mukekala bakasululwa. Mwamona? Mwafwainwa kusalulula. Mwakonsha kuuba byepi? "Koka kulwitabilo, pano Nalekelelako bintu byonse. Nalekelelako pano, kabiji juba jimo Amiwa kaya ku Bushiya."

Mu buwame kulutwe kulutwe,
Tukakunama ku yawa- . . .

Pano popwelaitu Nkambo mu mupashi wenu.

Mu buwame kulutwe kulutwe,
Tukakumanya akywa Kipwilo kyasulwa.
(Lwendo lwakosa, bino tukakumana juba
jimo.)

Kwi Taata wa kutemwa uji mwiulu,
Tukapana lutotelo lwetu,
Mambo a bupe bwa butemwe Bwanji,
Ne bibusa byo twatambu . . .

Na basulwa bacheche bakwa Nkambo, ko kulwitabilo, ko Nasalulwila.

Mu buwame (mu buwame) kulutwe . . .
(kulutwe ne kulutwe)
Tukakumana kubushiya kwawama; (kulutwe
kulutwe)
Mu buwame (mu buwame) kulutwe kulutwe,
Tukakumana kubushiya kwawama.
Kuji Ntanda ya . . .

Pano Aye mupopwelaitu. Abwe ke bupopweshi.

. . . kulwitabilo Nakonsha kumona,

Koka kulwitabilo Nasalulula.

Oo, Taata witupembelela . . .

¹⁴⁶ Namona bonse ba Nkambo kubushiya; Mulongo George, Mulongo Seward, bonse bazhijikwa.

. . . betunengezhezha mpuzha Kokwa. (Ee,
Nkambo!)
Buwame . . .

¹⁴⁷ Ba shanji, Howard, Edward, bonse bazhijikwa bakala balunda Batangijilepo, kunyuma kokwa, myaka yavula yapitapo.

Mu buwame (Ee, Nkambo!) kulutwe kulutwe
(kulutwe kulutwe),
Tukakumana kubushiya kwawama.
Tukemba kokwa kwawa- . . . (Anweba Lesa!)
Nyimbo yawama ya mapesho, (Lukumo kwi
Les!)
. . . kechi kukekala bulanda ne,
Mujitu mapesho Momwa.
Mu buwame, kulutwe . . . (kulutwe kulutwe)
Tukakumana kubushiya kwawa- . . .



KO KULWITABILO, MOSESA KDE58-0720M

(By Faith, Moses)

Ino Mbila na Mulongo William Marrion Branham, yalupwilwe patanshi mu Kizungu pa Mulungu lukeelo, Makumbikumbi 20, 1958 ku Branham Tabernacle ku Jeffersonville, Indiana, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org